

# 試法改定後之教育問題

南風

我國從古以來。朝廷雖不全担负教育國民之責。而寔擔認有開化勸導國民之義務。鄉村之間擇師設校聽斯民自爲主張。朝廷只懸試格以用人立章程以考士。凡有才有學皆得拔於榮進之路。故教育之事功雖簡。而所成就之效果甚宏也。可惜者其辰交通未廣。理化格致之學未聞。故國中只重科舉辭章之學。不適合於交通辰代人民生活上之所要求。然考千百年來。朝廷開放的教育。人民自由的學問。之辰期中。亦能造就多數人才。以供國用。卽鄉村之內。父兄之教子弟。師友之相講磨。社會爲公共之講堂。家庭爲天然之學校。賴此而成其爲重倫理守秩序之國民資格。嗟乎。古辰雖不專設教育部。不編輯教科書。而教育之澤所被甚廣也。去年十一月二十五日。南朝淵博場即前報載爲南朝高等學堂奉御賜名淵博場成立。住京欽使大臣致祝詞。內有云。「凡我法人猶憶纔臨斯土之辰。其所交接殊少。不識字之人物。彼村野小民。人人皆可以草漢字之控狀。讀漢字之簡句。一誠哉是言也。夫古辰教育。因其辰代之要求甚簡。科學之發明未聞。嬉遊於昇平極樂之天地中。學著心理。不過在文章華國之一事。此其誤點。固無可諱言者。然欲正此誤點。則想當從其所誤之處而改正之。不可因此而仇視舊辰之學問。使歸於消滅而後已也。

舊辰之教育。無切寔之統系。舊辰之學問。無切寔之用途。此其不適合於今日宜也。然舊辰家庭教育之法。聖賢義理之書。國民普及之學。決然不可一日無也。大法南來。以開導我民爲天職。然初來之辰。國內未定。故先謀治安上之必要。迨軍務及政局之布置。各已就緒。然後從事於改良教育問題。其辰因外界之擊刺。日本之維新。中國之廢八股。其影響

傳及我國。國中士夫。遂奔走呼號於廢科舉立學校一事。而我國學政。遂有一番之變革焉。成泰之終。維新之始。寔我國學界開始改革之辰期也。計自此辰期。至今已十八年矣。我國學問之前途。其有改觀耶。其或較進步於古昔耶。是則須待世人從成效上爲正確之評議。非記者敢妄言也。記者曰。凡天下間改革之事業。須遲以年代。方能著有效果。况樹人爲百年之計。十八年中。由舊而之新。由科舉而求理化。由亞學而轉歐學。之辰期中。舊穀既沒。新穀方升。青黃未接之秋。安能遽望其成效。此則吾儕宜以沉靜之態度。而徐觀學問發闡之光景也。雖然。辰期雖短縮。而教育之歷史。已屢變矣。國中無數之子弟。已拋棄一度寶貴之光陰矣。過去者長此去而不復返。將來者余日。望而未見其來。是以凡有心於學界問題。不得不爲之懸望者也。

或者曰。今日賴有大法國之教育。中等以上之學問。已陶就許多人才。何者。爲師範學。爲工業學。爲商業學。爲法政學。爲醫學。卒業之數。日見其繁。况各地方學堂林立。政府教導我民之計。亦已費盡心力。成就之效。固顯然在目前也。記者曰。誠然。政府作成我民之教澤。固爲我人所當銘感。然陶練人才以供用使。乃政府所當有之責務。若夫開化國民之道。則當從國民之全體上計。吾儕所期望諸政府者。則在乎國民之教育前途者也。

今試從國中之各都市而觀察。目覩青年子弟入學之光景。誰不曰。學界上之大進步乎。然試從村野之間。爲之觀察。則昔也弦誦之聲。聞於閭里。而今何如矣。又試從國中之學子而觀察。目覩十歲以上二十歲以下之學生。能略曉算學、格致、歷史、地輿、諸門。誰不曰。學界上之大進步乎。然試問國中無數之兒童。則昔也因從學簡便。猶可以爲識字之農民。而今則限於年格數額。不得其門而學。

者。又不知幾何人矣。要而言之。昔日凡家貧無可就學之勢者。方甘受爲無學之民。若家計稍裕。歲月稍閒。而有求學之志者。則隨地皆可以入學。學與不學之權在我。原無何等限制。此誠可謂爲自由學問之辰代也。今則求學之人。擇校而入者。恐十不得其半。此語想亦人人公認。非記者之誣言。夫昔辰之誤點。在於科舉辭章之學。改科舉而由學堂用人。改詩賦八股而教以格致理化。中學以上之教育問題。誠今日有優於昔日。自此我國民可引爲樂觀。而銘感保護政府開化之澤也。然昔日家庭之教育。人民自由延師講肄。處處家絃戶誦之聲。亦國民教育之大助力也。曰。彼所學之文字不適用。彼所學之書籍不合辰。則想宜以適合之文字及書籍改良之。改漢文而教以國語。改幼學尋源狀元詩而教以衛生算學倫理諸教科書。改作對作段而教以暗寫習讀。國家定以章程頒以書籍。及加以勸勵獎認之法子。則國中兒童方免失學之弊。而教育始可望其普及也。若夫教育之責。則於政府設教立學之外。想宜許國民之自由主張。以補國家教育之不及。窃想亦無何妨害於學政問題也。

今試就十八年來學政問題改革之一段歷史觀之。

一千九百四年。即成泰十六年四月二十七日。議定設立北圻學政衙。至一千九百六年。即成泰十八年二月日。議定設立議學會同。改定東洋學法試法各款。五月三十一日奉上諭改定中圻學法。經於是年九月十四日全權奉諭施行。又是年十一月十六日北圻統使遵奉。上諭議定各款。此學政開始變更之第一時代。其時即爲成泰十八年丙午鄉試場之後。八股告終之時期也。奉考成泰十八年七月初六日。機密院之奏章屬於更定教學與試法規式。這規式由議學會同之商擬。經蒙批准。其大略如左。

試法改定後之教育問題

四八

本國教法有三等。第一等曰幼學。第二等曰小學。第三等曰中學。

甲 幼學——由各社村自籌方法設立。以教六歲至十二歲之童男及童女。其延師以立私場者亦各隨其便。私場士子均得應核應試與公場士子同。——各社村得自遴教師。仍須由政官之準認。——府縣各教訓員有檢察鄉村幼學場之職務。——在各省蒞亦有設一幼學場。以爲各幼學場之規式。其場費由各省支給。——幼學場之教法有二。一曰漢字教規。二曰南音教規。漢字教規則教常用及關於倫理歷史地理政治之切用等漢字。南音教規則教以國語字及關於切要之政治風俗倫理禮法天文地理及衛生之國語字讀本。——幼學考卒業則得一選生文憑。——其陶造各幼學教師之法。則在省蒞有設一國語場。以教諸鄉師之不知國語字者。

乙小學。一各府縣均有設小學場(即教授訓導場)。一小學場之教規有二。一爲漢字教規。二爲南音教規。漢字教規則教以倫理、文章及北史、南史。由教授訓導爲之講教。南音教規則教以世界歷史、地理及格致、算學之國語書籍。且隨其便。或有兼教以法字。這南音教規如教訓員不能兼教。則有法越場之教師爲之助教。一省之督學官有檢察各小學之責。小學學成。則由省之督學爲主考官。會考各小學生中選者。得領課生文憑。

丙中學——中學設在省蒞。即督學場教法有二。一爲漢字教規。二爲南音與法字教規。漢字則教以較高之漢文書籍。以及於各項公文體式。南音則教以列國之歷史、地理及新辰之格致、算法與習做國語字之文章。法字則教以初等之法文字話。——學成之後由省考卒業。取中試生文憑。學年。一幼學在六歲至十二歲。小學在二十七歲以下。中學在三十歲以下。

此則最初辰期。屬於普通教育之組織也。夫組織國內之普通教育。而其學年則自六歲入幼學。至二十七三十歲。猶在小學中學之範圍中。數十年誦讀之功。猶未能練成一專才。以應世用。此亦改革上之最大缺點。然推究斯時起議這章程之本意。無亦設立暫時方法。以收取舊學之遺才耳。考當時幼學之組織。多有利處。其一則鄉村隨便設法。以立校延師也。其二則私場得自由設立也。其三則六歲之村童。皆有投學之地也。其四則凡各試生秀才諸人。皆得擔認教導兒童之責。不失其為開導童蒙之資格也。可惜者。斯時雖改幼學教法。而於幼學之教科書。無有善本。致於學問初階。無有圓滿之善果。由今思之。其缺點正在是也。使此後只從幼學以外之各階級。為之改良。而於幼學之組織。只保原成泰十八年之章程。並設局編輯國語教科書。以增進其程度。安知我國初級之國民教育。至今日不有改觀乎。

維新元年。諭增設學部。以專掌教育事務。二年遴舉修書所會同。以取次編輯小學中學譜教科書。三年又商定鄉總場之設立方法。及教師之資格。八年又擬立幼學章程各款。奉國家之注重於學務。亦云至矣。而其關於教育之結果。則何如乎。

他若維新年間考士用人之制。則試考究成泰十八年改定試法。及維新二年補議之試法。如左。  
 鄉試場。——第一場文策五道。屬修身、文章、倫理、歷史、法政等道。第二場儒字論體二題。第三場國語字論體三題。何係經中三場。願試法字者。由法字譯出國語一題。不願者不強。第四場覆核儒字論體一題。國語字論體一題。就中凡屬格致地輿題。暫用陳文通所撰國語習讀新書。屬漢字題。用五經四書正文。屬諸史題。不拘儒字國語字。均用南史北史諸書。惟清化、乂安、承天、平定四場。則第二

場於維新壬子科暫留詩賦一科。以後亦煥新式施行。至如會庭試法亦倣鄉試場新式改定第一場文策七道。經一。傳一。北史一。南史一。泰西列國史一。格致一。第二場詔諭一、奏疏一、表文一、均用今文第三場漢字論一題。國語論二題。文學。格致。辰務各一。第四場文策七道。萬國地輿。東洋政治一道。本國政治一道。本國人物一。道。六部憲章一道。均漢文。辰務二道。譯國語字。計自試法改後已酉維新三年壬子維新六年乙卯維新九年戊午啟定三年四科所試中之人才。其間寔由於舊學之教育所得。而非由於新學之教育所得。此亦人人所公認也。由新學之教育所得。特不過淺近之普通學及國語字。要而言之。亦小學以下未完全之程度耳。夫十餘年間。改良學務。而未能確立幼學之基礎。致國民教育。無日不在於飄搖風雨之中。其終也。亦與科舉同時歸於消滅。此可謂學政上之一悞歷史深爲憾惜。而我國學問前途。被其停頓而不進者。亦職此之故。

雖然學務之不進步者。非是全由於當辰學規之缺點。夫幼學組織之有利益。前已言之矣。惟當時承行之下。不能了然於國民普通學之趣旨。府縣則以咨飭爲具文。鄉村則以虛應爲了事。無數之教師。只苟且從事。期得週限以博取一賞。洋洋濟濟之兒童。則不啻嬉遊於不知不覺之天地中。於知識上毫無所得。要而言之。各國學級之分別。太爲明晰。凡學生於幼小。屢須使之求通常智識之學。以造成國民資格。經過此級。然後隨其資格。各占專科之學。以練成人才。我國則不然。學問上之本來根性。除却及第做官之外。無復有求學之必要。即不然者。亦求於鄉社內。得免差免徭之地位。然後從學耳。夫我國人對於學問之觀念。如是無怪乎。最初時國家以國民教育之方法頒佈之。則視爲可無可有之具文。而不知迎機以應之也。

夫改革必以其漸此固然矣。然試觀維新年間之學務改革，則適爲學界之阻力何也？學政雖改而應用此學政復有新定之試法。小學中學所成就之才不切於世用。一則對於舊學無有完全之資格。一則對於新學無有接納之資格。一則對於普通教育未必全知。一則對於人才教育毫無所得。其結果遂成爲新不新、舊不舊、半上落下之人物。雖然試法猶存，則國中無數之子弟猶終日埋頭於几案，以練習此等無味之學問。推國家暫時改革之本意，特不過爲舊學之遺才設別格以收用耳。然舊學之遺才未能盡收，而國中新進青年費却十餘載寒暑，隨此新法而陷落其前途者不知凡幾。此改革以漸之一語亦可當引爲鑒戒者也。

使當時雖顧念舊派，改試法以收遺才，然只對於二十歲以上之試生秀才爲有限制之組織。他若學問章程，則明定其階級，確立其基礎，要先懸一歸宿之地點，以爲趨向。於是循序進行，務使青年子弟均由此一途而向往，則竊想數十年來可無虛費時日，而學界之前途亦免紛岐之惑矣。夫前此學政之成立未穩，確其終也不得不再行更定，而教育之責全授之保護政府代理，此亦無足怪也。今試就政府更定之學政總規觀之。

(未完)

## ▲ 亞洲諸國考

我人居於東亞，向來所讀者惟中國書籍，故中國歷史人能言之。若同洲中之其他諸國，雖僅得聞其名，仍其立國之久近，歷史之情形，殊茫然也。今世界交通，我人多趨西學，歐美諸國之歷史，猶得而言之。而何況同洲之諸國乎？所謂日本、印度、暹羅、朝鮮、波斯、尼泊爾、阿曼、不丹、阿富汗、斯坦、高加索、西伯利亞、緬甸、瓜哇、斐律賓、馬來諸國，其國土之名稱若何，位置若何，沿革若何，何者爲獨立，何者爲

者爲外屬。並其政體民風如何。想我人爲東亞之同胞。亦當急欲得知者也。茲據中國學者近代史之考究。略輯錄之。以公諸同人焉。

### ★日本 Japan (帝國)

日本亞東島國也。以五大島與四千小島組成。由東北而西南。延長約七千里。北爲千島羣島。中爲日本羣島。南爲琉球羣島及臺灣島。東南爲小笠原羣島。連於大洋洲。西爲朝鮮半島。接於中國之奉天吉林兩省。西北之庫頁島。則與俄羅斯共之。  
 當中國周惠王時。有神武天皇者。征服諸部落。奠都於太和之樞原。爲日本建國之始。漢獻帝時。神功皇后征服三韓。而百濟王以使來。皇太子師之。於是日本始有中國之文字儒學。梁簡文帝時。百濟復以使來。傳入佛教。隋文帝時。推古天皇立聖德太子攝政。編法制定冠位行曆法。撰國史。遣學生留學於隋。唐時復遣置使臣。專輸入中國文化。於是日本之文物制度。日臻美備。唐睿尊時。元明天皇遷都奈良。歷七君七十五年。武事不興。文學美術大張。稱奈良朝之盛。唐德尊時。桓武天皇復徙都山城。即今京都府朝廷之規模益整。然自後三百餘年。外戚藤原氏秉權。專橫恣肆。政治不修。至宋高尊時。以皇位繼承。遂釀保元之亂。平治之亂。繼之。平氏得勢。及源賴朝滅平氏代興。宋孝尊辰。討平陸奥之亂。始建幕府於鎌倉。政權乃移於武家。政府僅存虛名。源氏傳三世家臣北條氏篡之。宋理尊時。後鳥羽上皇徵諸侯兵。討北條氏。敗績被逐。是謂承久之亂。朝廷之威權益墜。元世祖忽必烈。既征服高麗。乃遣使招降日本。日本殺之。世祖發水師來討。適遭颶風。艦隊盡覆。元英尊時。後醍醐天皇滅北條氏。建中興之業。晚年失政。足利尊氏乘之。反於鎌倉。後醍醐走保吉野爲南朝。足利氏別擁立光明帝。自稱大將軍。開幕府於京都之室。

町爲北朝。南北朝分立。凡五十七年乃合。足利氏十數世而替。政權下移陪臣。於是羣雄割據。互爲兵爭。成戰國之勢。明神尊織田信長。起尾張代足利氏。當國柄。仁豐臣秀吉等平定近畿。經略諸道。信長旋被弑。權歸秀吉。秀吉既平定國內。乃寇朝鮮。與明相持。既而卒。德川家康代爲政。秀吉臣石田三成等。僨知家康謀。將不利於豐臣氏。起兵攻家康。家康與戰於關原。三成敗死。家康遂自爲大將軍。開幕府於江戶。越十五年。滅豐臣氏於大阪。政權全歸德川氏。

家康既定霸。乃偃武修文。振勵儒術。於是學派人才蔚盛一辰。又獎勵航海事業。並開港於長崎。與外國貿易。傳至孫家光。頤良明崇以島原基督教徒之亂。乃嚴禁傳教。并絕外人通商。厲行鎖國主義。至孝明天皇之嘉永六年。三年美將彼理率兵艦至相模之浦。賀俄英法繼之。先後刦盟。幕府知弗敵。乃復許開港通商。然攘夷之說。於此益熾。至明治天皇立。大將軍德川慶喜還政。於是幕府始廢。天皇乃親攬萬機。明治元年。九年一月遷都江戶。號曰東京。三月天皇以五事自誓。爲維新之基礎。二十二年頒布憲法。二十三年開設國會。二十七年。光緒二十年戰勝中國。割中國臺灣。澎湖。三十七年。又戰勝俄國。與俄人中分遼東之利。又割庫頁島之半。而以朝鮮爲保護國。四十三年。遂滅朝鮮。於是日本稱雄東亞。爲第一等強國矣。

政體爲君主立憲。立法行政司法三權鼎立。立國機關曰帝國議會。合貴族院及衆議院而成。行政機關曰內閣。分內務、外務、大藏、陸軍、海軍、司法、文部、農商及遞信九省。內閣總理統率之。司法機關以裁判官組成。計分四級。最上級爲大審院。次控訴院。次地方裁判所。最下爲各區裁判所。地方政府分全國爲三府四十三縣。而置道廳於北海、朝鮮、臺灣。則特設總督府。

軍備行徵兵制。陸軍全國分十八師團。東京有近衛兵。朝鮮臺灣置守備隊。海軍置一百六十三艘。排水量達六十九萬一千噸。軍人六萬餘。爲世界海軍國之一。位列第五。

民族以太和族爲主。勤儉勇敢。人口總計約六千七百萬。密度位世界第四。近十年間。每年平均增五十萬人。

尊教以神道爲主。次爲佛教。奉基督教者頗少。神道教祭祖尊拜英傑。而無經典。初非純粹之尊教也。文字有漢字。有假名。假名爲通俗所用。婦孺多知之。文言則參用漢字。

教育古重漢學。維新後取泰西文明。參以泰東學術。爲日本新教育。全國小學達三萬所。學童八百萬不就學者。祇百分之四。中等教育近年亦甚進步。高等教育有帝國大學。醫科大學。官立高等醫學專門。海陸軍大學。高等師範農科大學。及工商農林諸高等學校等。華族教育有學習院及華族女學校。國內各都會均設有圖書館。以供國人之展覽。

日本寔業向以農業稱。米最盛。麥次之。近復講求蠶桑。培養森林。故絲茶之輸出日多。絲之產額僅次中國。工業織物。磁器等。皆頗精巧美麗。棉織物多輸入中國。礦則煤銅頗多。石材亦富。商業發達甚速。今且與歐美諸國抗衡矣。其海外貿易。以中國爲最盛。占貿易全額七分之一。自中國輸入者。以棉砂糖。豆。豆粕。麥粉。雞蛋等爲大尊。輸出於中國者。以棉紗。棉織物。煤。木材。火柴。海產物等爲尊。

### △ 日屬朝鮮

朝鮮舊稱韓國。在中國滿洲之東南。東亞半島國也。周武王封箕子於朝鮮。爲其建國之始。四十傳至箕準。漢惠帝有燕人衛滿者。率衆來屬。尋逐箕準而自立爲朝鮮王。後漢武帝滅之。置真番。臨屯。樂浪。玄菟四郡。漢元帝辰扶輿國人朱蒙據玄菟郡之高句驪縣。建國曰高句麗。其次子扶輿溫祚。建國於馬韓。曰百濟。百濟之東南。曰新羅。爲辰韓別部。自後三國互相攻侵。迭爲雄長。至唐高宗使蘇

定方滅百濟。李勣滅高句麗。新羅則臣服於唐。既而竊并百濟高句麗故地。統一半島。唐末國亂。王族弓裔起兵據東北部。甄萱據西南部。旋王建奪弓裔地降新羅王。滅甄萱。奄有古朝鮮及三韓之地。建高麗王國。明太祖洪武二十五年。大將李成桂篡立。改國號曰朝鮮。即今朝鮮勝國也。二十三傳至李熙。以同治二年卽位。生父興宣大院君李是攝政。既不忿恨后族閔氏之奪其權。煽京師衛兵夜襲王宮。并數日本使館。中國政府聞變。急遣兵鎮之。拘大院君以歸。日本問罪於朝鮮。責償金且約此後駐兵衛使館。光緒十年。親日黨洪英植金玉均等與日本公使竹添進一郎入宮謀廢立。中國師來赴難。與日兵戰於宮門。斬洪英植金玉均等奔日本。光緒二十年。朝鮮東學黨作亂。中國遣兵平亂。而日本亦以兵來。中國以亂平。要日本同撤兵。日本則欲兩國共革朝鮮內政。中國拒之。兩國遂宣戰。明年乃和。訂約於關公認。朝鮮爲獨國自立。是朝鮮不爲中國藩屬。建元稱帝。號曰大韓。然政治大權則操之日本。而日本之遇朝鮮益無所不用其極。光緒三十年。日俄和議。認朝鮮爲日本保護國。於是日本使伊藤博文迫韓王。令棄其外交權。而置統監府於韓京。分建理事廳於各道。光緒三十三年。日本復迫韓內閣令韓王禪位於其子。且解散韓國軍隊。以行政司法之權悉授諸日本。韓人憤激。宣統元年冬。有安重根者。擊殺伊藤博文於哈爾濱。翌年秋。日本遂併韓。置朝鮮總督府。

總督統握大權下。有政務總監。及總務度支內務農商工司法之五部。全境分十三道。各道置長官。居民與中國同種。約千二百萬。國亡後。日本政府施以種種苛政。而日本人之遷入者。亦日以排除異種。爲事以故。日就彫落。

朝鮮風俗典禮。一倣中國。曩時並通用漢文。今則日本人施以日本文字之教育矣。國內尊教上流社會多尊崇孔孟。現時信奉基督教者亦不少。生業以農爲主。自歸日本。後政府特議東洋拓殖會社。從事拓殖沿海漁利頗豐。亦歸日本掌握。產麥米豆煙草人参虎豹牛驥魚類金鐵之類。

## ◎曰屬琉球

琉球卽日本冲繩縣。介日本臺灣之間。以三十六島組成。本中國屬國。明太祖洪武五年。冊封琉球士爲中山王。國號中山。奉中國正朔。自後歷五百年。貢獻不絕。清光緒五年。日本侵掠琉球。中日幾開戰端。依美國大統領古蘭德調停。割八重山及宮古以外諸地歸之。日本及光緒八年。遂均爲日本所奪。廢其王。改爲冲繩縣。置縣廳焉。

居民約五十萬人。種當係八閩之一。衣服如中國古制。文字亦同中國。惟別有土字。今又通行日本字。其地產米最盛。一年可三穫云。

## ▲曰屬臺灣

臺灣卽宋史中之毗舍那國。在中國福建東南之海中。自臺灣島及澎湖諸島而成。元置巡撫司於澎湖。明初廢之。嘉靖中。海寇據臺灣爲琉球人所逐。天啓中。日本又逐琉球而有之。閩人鄭芝龍客日本。嘗寄居於此。又嘗徙閩人數萬至臺。使墾島荒邑。聚浸盛。及荷蘭人東來。復逐日本人。築城通商。漸成都會。清初鄭成功以復先業爲詞。迫荷蘭人他徙。遂奄有全臺。招聚人民。汙萊日闢。傳三世。至克墾。降清。臺灣於是隸中國福建省。置府縣治。甲午之役。依馬關條約。割歸日本。分全島爲十二廳。置總督統治之。

居民凡三百二十萬。除生熟番十三萬。日本人七萬一千外。均是華人。地沃宜農。茶米蔗糖均富。山內森林茂盛。樟樹之盛。冠於世界。煤。煤油。砂金等之礦產亦不少。

## ●暹羅〔王國〕

暹羅在印度支那半島之中部。面積與中國桂、滇、黔三省相等。國都曰磐谷。本暹與羅斛二

國元順帝至元十一年。西曆一千三十五七年。<sup>西曆一千三  
五百七十年</sup>羅斛王參烈勃羅達怡菩提并暹國。是爲暹羅第一朝。凡二十傳。至明萬曆間。王族松唐篡位自立。爲暹羅第二朝。崇禎初。宰相喀利扶美篡立。而第三朝興清乾隆三十二年。<sup>西曆一千八百六十七年</sup>爲緬甸王孟駿所滅。孟駿死。國內亂。中國人鄭昭起於磐谷。逐緬甸戍兵。恢復暹羅。旋鄭昭被弑。其婿鄭華繼之。復破緬甸兵。入貢於中國。遂受封爲暹羅王。辰乾隆五十五年也。四傳至庫臘龍坤第一。以西曆一千八百六十八年嗣位。<sup>同治七年</sup>憚於安南。緬甸之覆轍。毅然以變法爲事。親歷印度及歐洲。而遣子弟入學於各國。更官制。修法律。且廣建學校。頗有蒸蒸日上之勢。然爲兩大所睢盱。國境日蹙。法人自得安南。仍銳意西略。遂迫暹羅割湄公河東岸之地。而英人滅緬甸後。亦東向經營。上老撾。自法之得地。英人出而抗議。并取馬來半島之暹羅領地。以爲抵制。因定湄公上游爲中立地。相約不得侵。繼又定暹羅之中部爲中立地帶。然英法之齟齬。終不絕。千九百四年四月。英法之協商成。以渭南河西部爲英國勢力範圍。而以其東部爲法國勢力範圍。各於其範圍內。任意行動。自是暹羅之國權。幾盡被奪。然終以內政日修。尙爲外國所重也。

政治爲君主專制。政權屬國王。內閣分外交、內務、司法、財政、文部、工部、陸軍、海軍、警察、九部。閣員以王兄弟或王子任之。此外有立法院。以修正法律爲目的。全國分十八州。州置知事。直隸於國王。州又分爲郡。郡置郡長。軍備則行徵兵制。

人民凡八百十五萬。<sup>其中中國人約一百四五十萬</sup>大抵爲蒙古種。及馬來種。體弱性惰。好賭博飲酒。虔奉佛教。全國教育佛寺凡七千六百九十七。僧侶十八萬六千四百十三人。教育幾完全操之僧侶。生業以農爲主。漁次之。經商者甚寡。外國貿易多恃華人爲媒介。物產以米爲主。年可二穫。其次則爲麻栗、海產物、皮革等。

〔未完〕

●文苑

文明殿大學士蓮亭尊室相公致仕

留柬一首

七旬霜鬢笑龍鍾。矜老皇恩造化同。會際風雲知有幸。官居鼎鼐愧無功。仰憑族姓傳仁厚。歸示兒孫篤孝忠咫尺。闕廷翹帝治謀謨協。

贊望羣公

尙書致仕高春肖留柬二首

應世慚非練達才。夤緣一宦卅年來。遭逢有幸

皇恩厚。歲月無情白首催。綠野高堂娛待養。黃花小徑喜重開。江湖廊廟皆臣分。翹首南屏上

壽杯。

卅年從事簿書間。天予平康帝予閒班馬

非才慚世史。彌鴻有約訪家山。鈞韶闕下三更

夢畫錦堂開五綵。斑圖報夙心無進退。此生臣

子兩相關。

參知致事橘亭膺蕙留柬

雪散冰消春又來。悲悲喜喜兩相催。勞形案牘慚無補。措手經綸笑不才。忠孝家風欽聖教。

由恭祖題壁聯云。萬卷書惟忠孝字。春秋業在聖賢關。

往存恩典仰

由恭親父蒙準追授尚書。恭陞授參知。

天裁

由恭親父蒙一家恩典榮幸爲何如。

東籬採菊頻露露。自是仙

源厚澤培。

恭餞南定總督范公檀園上京

官業三朝著。年花六甲開。投簪章一上。前席詔頻催。鴻爪潢江雪。鶯聲二月梅。家山葱鬱氣。春色御屏來。

十年雄鎮駐旌旄。憂愛元臣久服勞。未果五湖遊。范蠡祇緣四岳舉臯陶。詔書屢下名尤重。官謗全無位。本高人士臨行相屬望。內修朝政外邦交。

古

興安合濟會朱黎衡奉草

鶯聲。二月疇南樓。公請歸田帝挽留。明問久虛宣室席。春風爲阻五湖舟。江山別意鴻留爪。君

國憂心白盡頭。從此香屏天日近。老臣品價重  
皇州。

右興美朱黎衡拜餞

前輩昔有范蔗園。經綸學識博海外。辰賢今有  
范檀園。新書旁考貫五大。廉明剛正多出人。藉  
甚聲名久課最。十年南太兩雄藩。游刃恢恢無  
肯綮。聞公屢疏乞歸休。政府需公切挽留。公方  
思索遂所請。朝廷又命公分猷。知公歸計未

可得。願公應召付所求。不見黃菊晚彌香。不見  
青松老彌剛。歷閱如公旣老煉。文章政事又兼  
長。况在江湖在廊廟。况爲金背爲干將。生平抱  
負古范老。何當黼黻贊吾皇。吾皇圖用思  
舊人。一顧幾空冀北羣。戶曹懸待爲河北。河北

△文明殿大學士扶光伯爵尊室相公致仕謝恩表

啓定八年正月

臣尊室忻稽首頓首謹奏爲恭謝。皇恩仰祈。睿鑒事本月十三日欽奉。硃諭內一款朝廷  
之設休例。所以體人臣國事久勞矜其老而致之逸也。太子少傅武顯殿大學士管領刑部尙書充  
機密院大臣兼管欽天監事務扶光伯尊室忻朝班碩輔銀派重臣國務多年忠勤一片合當盡瘁

如公眞選倫。九重簡卷蓋有取。一片冰心見  
表臣。豈惟明良千載會。仰見一視歸同仁。明  
朝南浦開供帳。百兩驅車滿江上。輿歌曲曲雜  
驪駒。盆祝聲聲遏笛響。企予且立錫山頭。千里  
行塵一遙望。正喜聖朝多得人。南北賢賢同  
輔相。

右永安備撫阮文彬黃奉

宿歌者家章民  
無地中原著此僉。江湖輾轉歲華更。魂游林下  
歸難穩。身在花間夢不驚。夜獨聞歌傷子野。時  
艱搥鼓感爾衡。百年逆旅同卿等。何用明朝惜  
別情。

用表同休乃屢番疏請出自眞誠姑念質老事煩賜之安逸特準陞授文明殿大學士俾之榮奉新恩歸來養逸欽此欽遵臣拜 命之下懼感交集謹奉表陳 謝者竊念臣金鐵頑質銀潢支流以先朝簪履之遺爲顯宦梯階之徑當獄訟來歸夏后正微臣承乏秋官雲雨 乾行利見飛龍之象土茅晉錫慚無汗馬之勳迺蒙 聖慈委以心腹顧臣孱弱曷當股肱間雖了得事功規畫全憑於指措節奉形諸 溫諭褒嘉特出於 優容成全有天稱塞無地念疲牛騰駕敢辭今生驅策之勞而倦鳥知還竊凜古人止足之戒重以年紀既邁膂力又憲事與心違勤難拙補欲鞠躬而盡瘁恐竊位以招尤嘗稽致仕聖謨則臣行庚已七十歲恭炤回休新例則臣通籍餘四十年自知三宜休所以再陳乞蒙 陛下鑒臣籲疏至今春 準臣抽身 加顯秩以花其歸 紿休俸以贍其養捧溫綸而感激望 仙禁以徘徊宴罷長春 陞辭宣室 君門咫尺林泉而韶夢非賒臣分始終畎畝而春膏普被仰 旭日大明之炤藉白隱衷撫殘年積病之身恍蘇弱骨 天 地不歌功父母不頌德惟知生成覆載之難名仕宦而至相富貴而歸鄉寔非平昔夢想之所及茲蓋伏遇 皇帝陛下心行天下 仁逮臣工 洞察辰宜 恢張庶政格上下被四表 明德端睦族之標爲國家有九經 親親繼體臣之典翹仰春天露湛 鴻造無私致令秋圃霜餘黃花亦潤况臣子臣尊室闈新蒙 諭準補領平定省按察使一門幸福千載奇遭人或羨其榮光臣倍深其踴躍前後之拜寵命雖木石至鈍亦當知恩涓埃之對崇深卽草環來生未足言報臣惟有汗顏自惕銘心不忘奉忠孝爲傳家勵兒孫以報國桑榆雖晚葵藿長傾白社會談宣 德意以告父老丹心永矢處江湖亦繫君民遞年趨拜 慶之班以對揚 天子休命吉月具入 朝之服或辰告我 后謨猷伏願

宸衷懋撫 廟算明以理庶獄 仁以養羣黎 修政令以肅朝綱 敦信睦以固鄰誼上以副兩尊宮期望之至意下以 立皇太子永遠之鴻圖奠 尊 社於億萬年磐泰之安進國步於五大洲文明之盛臣得以優游歲月歌頌昇平此寔臣愚淺一片衷敢以冒塵於 九重之聽庶幾臣他辰九京下可告無罪於 列廟之靈臣下情……

◎辰談 國 內 之 部

▲ 春 首 謹 恩

諭有朝廷必有官職用理邦家上有君下必有臣爲之輔佐惟務茲繁緒治不獨威所以設六部分司政治臣代君勞然而庶務不可無統於是奉我 聖祖仁皇帝命設樞密院後改爲機密院以能臣充之用關軍國重事統理庶務而國家樞紐繫焉迨于茲辰事關交涉朝綱體統政治教刑上致下澤中篤友邦尤於機密院諸大臣焉是賴人君於是乎可以垂拱正南而治書曰元首明哉股肱良哉庶事康哉唐虞之治不益見歟乃三十年來諸大臣率多尸素動輒維私求乎憂愛忠勤邈焉寡見政體以之式微朕卽位以來宵旰困慮其於綱紀風俗雖未能十分振整而事修政舉次第漸有可觀惟歐亞交通之辰兩樣文明行當混合用中政策成爲艱著而吾民之智腦之思想日漸登躋苟用司牧而不完全資格其人安能有濟然則國家事務重大正是諸大臣之責用尤當體朕焦勞庶或敏臻至治邇來機密大臣尙少六部部長未充恰值新春聽朕簡命太子少保東閣大學士管領吏部尙書兼掌戶部事務充機密大臣兼管文臣駙馬福門伯阮有排政治旣充資格性能審

慎而且達識辰機朕曾規諭頗覺遵循可謂晚年進德著準加太子少傅停兼戶部仍領吏部尙書充機密院院長大臣仍兼管文臣駙馬卿其盡心乃職以弼朕躬務期庶事咸熙以慰朕爾來之知遇太子少保協佐大學士管領禮部尙書兼掌工部事務充機密院大臣國史館總裁慶美子胡得忠練達老成敏文曉禮我邦典禮尤敦著準兼管欽天監事務停兼工部仍充領併著賞彰賢二項龍佩星壹面協佐大學士管領兵部尙書兼掌學部事務充機密院大臣兼管都察院國子申仲憒秉性剛直不避親讎自充領來茲凡事善持義務著準加太子少保銜仍充領協佐大學士兼攝尊人府務大臣尊室湛慶譜中人秉性謹厚經蒞民政亦保妥安自兼攝府務至茲皇派中多所振整對朕亦素有忠誠著準加太子少保銜仍兼攝府務署協佐大學士領平富總督武濂歷涉世事每臨民政多所用功於國家曾有補益著準寔授協佐大學士調領工部尙書充機密院大臣加協佐大學士領安靜總督陳廷栢儒家風致德厚底人且兼秉性慎重雖屆休而用德尤要年齒况刑罰又尙審慎著準寔授協佐大學士調領刑部尙書充機密院大臣南定省總督范文樹科甲出身清廉素性通達辰勢肩用綱常從事北圻三十餘年而尊君親上一心爲北圻民所敬慕朕已稔知著準陞授協佐大學士調領戶部尙書充機密院大臣俾充職務是朕量才簡予庶職既充六卿無缺正望卿等分朕焦憂其各國事盡心邦典率屬俾之大法小廉表端影正用能無偏無黨無怠無欺無蔽無私無阿無冗以引國家於富強殷盛稱朕意焉夫用人如器各擇其才方今辰代惟艱古禮今文兩相互通卿等旣各有資格又各有功勞國家知而進用雖或有一二卿士夫之未服者爲未解也國家何計焉卿等亦當知之而各竭力以報國家知遇之毅力之殊恩而且爲吾民之瞻視以無

負朕與保護用賢至意欽此

啟定捌年正月拾五日

諭朝廷非一士略衆職所以廣功蒞事各有分司考陟亦須量簡惟辰值文明交泰治固維艱而人之能否不同明難普悉第值春韶布令雖因才而亦以觀能臣道當勞各體意而欽修乃職加總督銜之河靜省巡撫阮科濱著準陞署南義總督加總督銜之治平巡撫尊室檀著準陞署安靜總督廣義省巡撫阮廷獻著準陞署平富總督署兵部參知膺厖著準陞授伊部參知仍充護城兵馬副使平順省布政使尊室褚著準陞署廣義省巡撫廣平省布政使黃兼著準陞署河靜省巡撫承天府府尹王賜大著準陞署治平巡撫太常寺卿管理侍衛充御前文護駕阮有庇著準陞署參知銜仍充從事保護現巡撫銜之上項二項商佐阮登三性行純雅學問博洽諳曉國朝體例著準改授參知銜充機密院參佐兵部侍郎黃大秉著準以本銜改領刑部參知光祿寺卿領刑侍郎阮叔巒著準陞補廣平省布政使光祿寺卿領戶部侍郎阮廷薦著準改陞兵部侍郎原富安省布政得降之阮文理自得降來茲頗知歛悔朕念學功勞苦稍有文才不忍終棄著準開復太常寺卿充國史館纂修原刑部侍郎之黎至詢以不擇言于咎蓋亦懲其微耳自來察知悔過亦當原情其著準開復伊部侍郎清化省布政使丁春擢雖已屆休而膂力尙強况伊員行事多於果斷著準改補平順省布政使按察領河靜省布政使膺蓀著準以本銜改補清化省布政使平定省按察使潘光著準調改光祿寺卿領戶部侍郎廣南省布政尊室廣近來多有聲迹著準改補河靜省布政使遺缺察有內臣之署參知充御前通事蔡文瓚法學廣博頗有機關秉性慎重自充御前通事來茲一片忠

誠盡心圖報每凡朕交涉通話均得妥濟亦當許補外職俾曉民政那辰召回京職以弼朕躬其著  
準改署巡撫補領廣南省布政使仍準一二月回京一番以便顧問光祿寺卿領工部侍郎膺胖著  
準寔授伊部侍郎鴻臚寺卿佐理禮部事務楊光略著準陞授光祿寺卿領伊部侍郎鴻臚寺卿領  
平定布政使吳廷魁著準陞授光祿寺卿仍領伊省布政鴻臚寺卿領廣治按察使胡得愷著準寔  
授伊省按察鴻臚寺卿佐理學部事務阮伯卓著準陞授光祿寺卿仍佐理伊部事務鴻臚寺卿領  
平定省安仁府知府尊室闈著準以本銜領伊省按察使光祿寺少卿領壽春府知府阮思再清白  
居心公務勤幹鹹蒞京縣承天轄民素多帖服著準陞授鴻臚寺卿補領承天府府丞光祿少卿領  
都察院掌印申仲悅著準陞授鴻臚寺卿仍領光祿少卿吏部暫派阮春覃前蒞演州府知府民情  
不服邀駕至三四款擬留不便準調回由部暫派朕經覽邀駕諸本詞訟矇曉前後不一這款亦無  
須擬其準以本銜改領都察院京畿道掌印增睿皇太子房助國卿強植爲人恬而且敏稍有學行  
况奉先太子高勳猶昨自來未有分榮殊可追想茲伊員雖累襲銜亦應特格量予著準免其遜秩  
改授光祿少卿領奉護使侍讀學士領機密院員外郎高春腔著改準授鴻臚寺卿仍領侍講學士  
領機密院主事阮頤著準改授光祿少卿仍領內閣承旨之阮高標自準補入內閣來茲朕常勅撰  
諭語祝辭頗多稱旨况伊員秉性忠誠稍有見識自隨駕如西日夜專勤公務確有勞幹其著準陞  
改鴻臚少卿領內閣侍讀是各因才量簡爾文臣等各宜盡心本分務要清慎忠勤以匡乃辟用期  
國家日晉富強是朕與保護之深望期也欽此

啓定八年正月十八日